

松漢紀聞

宋洪皓撰



宋 洪皓撰

(國學文庫第四編)

松 漠 紀 聞

全

中華民國二十二年十月重印

松漠紀聞

宋 鄴陽洪 皓撰

明 新安吳 琯校

女真卽古肅慎國也東漢謂之挹婁元魏謂之勿吉隋唐謂之靺鞨開
皇中遣使貢獻文帝因宴勞之使者及其徒起舞于前曲折皆爲戰鬪
之狀上謂侍臣曰天地間乃有此物常作用兵意其屬分六部有黑水
部卽今之女真其水獭之則色微黑契丹目爲混同江其江甚深狹處
可六七十步闊處至百步唐太宗征高麗靺鞨佐之戰甚力駐蹕之敗
高延壽高惠真以衆及靺鞨兵十餘萬來降太宗悉縱之獨坑靺鞨三

千人開元中其酋來朝拜爲勃利州刺史遂置黑水府以部長爲都督
刺史朝廷爲置長史監之賜府都督姓李氏訖唐世朝獻不絕五代時
始稱女真後唐明宗時嘗寇登州渤海擊走之其後避契丹諱更爲女
直俗訛爲女質居混同江之南者謂之熟女真以其服屬契丹也江之
北爲生女真亦臣于契丹後有酋豪受其宣命爲首領者號太師契丹
自賓州混同江北八十餘里建寨以守予嘗自賓涉江過其寨守禦已
廢所存者數十家耳

女真酋長乃新羅人號完顏氏完顏猶漢言王也女真以其練事後隨
以首領讓之兄弟三人一爲熟女真酋長號萬戶其一適他國完顏年
六十餘女真妻之以女亦六十餘生二子其長卽胡來也自此傳三人

至楊哥太師無子以其姪阿骨打之弟諡曰文烈者爲子其後楊哥生子闡辣乃令文烈歸宗

金主九代祖名竈福追諡景元皇帝號始祖配曰明懿皇后八代祖名訛魯追諡德皇帝配曰思皇后七代祖名佯海追諡安皇帝配曰節皇后六代祖名隨闡追諡定昭皇帝號獻祖配曰恭靖皇后五代祖孛堇名實魯追諡成襄皇帝號昭祖配曰威順皇后高祖太師名胡來追諡惠皇帝號景祖配曰昭肅皇后曾祖太師名核里頗追諡聖肅皇帝號世祖配曰翼簡皇后曾叔祖太師名蒲刺束追諡穆憲皇帝號肅宗配曰靜宣皇后曾季祖太師名楊哥追諡孝平皇帝號穆宗配曰貞惠皇后伯祖太師名吳刺束追諡恭簡皇帝號康宗配曰敬僖皇后祖名旻

世祖第二子咸雍四年歲在戊申生卽阿骨打也滅契丹諡大聖武元
皇帝號太祖同母弟二人長曰吳乞買次日撒也阿骨打卒吳乞買立
名晟諡文烈皇帝號太宗配曰明德皇后今主名亶阿骨打之孫繩果
之子繩果追諡景宣皇帝亶之配曰屠始坦氏

阿骨打八子正室生繩果於次爲第五又生第七子乃燕京留守易王
之父正室卒其繼室立亦生二子長曰二太子爲東元帥封許王南歸
至燕而卒次生第六子曰蒲路虎爲堯王太傅領尙書省事長子固礪
力本切側室所生爲太師涼國王領尙書省事第二曰三太子爲左元帥
與四太子同母四太子卽兀朮爲越王行臺尙書令第八子曰邢王爲
燕京留守打毬墜馬死自固礪以下皆爲奴婢繩果死其妻爲固礪所

收故今主養於固礪家及吳乞買卒其子宋國王與固礪粘罕爭立以今主爲嫡遂立之

吳乞買乙卯年卒長子曰宗磐爲宋王太傅領尙書省事與滕王虞王皆爲悟室所誅次曰賢爲沂王燕京留守次曰滕王虞王袁王撒也稱

搯

鄒感切

扳

音板彼云大也

李極烈吳乞買時爲儲君嘗謀盡誅南人

闕辣封魯王爲都元帥後被誅其子太拽馬亦被囚因赦得出庶子烏拽馬名勛字勉道今爲平章

粘罕者吳乞買三從兄弟名宗幹小名烏家奴本曰粘漢言其貌類漢人也其父卽阿盧里移賚粘罕爲西元帥後雖貴亦襲父官稱曰阿盧里移賚李極烈都元帥李極烈彼云大官人也其庶弟名宗憲字吉甫

好讀書甚賢

悟室者女真人悟作鄔音或云悟失名希尹封陳王爲左相誅宋克滕虞凡七十二王後爲兀朮族誅

回鶻自唐末浸微本朝盛時有入居秦川爲熟戶者女真破陝悉徙之燕山甘涼瓜沙舊皆有族帳後悉羈縻于西夏唯居四郡外地者頗自爲國有君長其人卷髮深目眉脩而濃白眼睫而下多虬髯土多瑟瑟珠玉帛有兜羅縣毛氍毹錦注絲熟綾斜褐藥有膻肭臍硃砂香有乳香安息篤耨善造寶鐵刀劍烏金銀器多爲商賈於燕載以橐它過夏地夏人率十而指一必得其最上品者賈人苦之後以物美惡雜貯毛連中

毛連以羊毛絣之單其中所頭爲袋以毛繩或絛封之有甚麤者有閒以雜色毛者則輕細

然所征亦不貲其

來浸熟始厚賂稅吏密識其中下品者俾指之尤能別珍寶蕃漢爲市者非其人爲僧則不能售價奉釋氏最甚共爲一堂塑佛像其中每齋必刲羊或酒酣以指染血塗佛口或捧其足而鳴之謂爲親敬誦經則衣袈裟作西竺語燕人或俾之祈禱多驗婦人類男子白晢著青衣如中國道服然以薄青紗羃首而見其面其居秦川時女未嫁者先與漢人通有生數子年近三十始能配其種類媒妁來議者父母則曰吾女嘗與某人某人昵以多爲勝風俗皆然其在燕者皆久居業成能以金相瑟瑟爲首飾如釵頭形而曲一二寸如古之筭狀又善結金線相瑟瑟爲珥及巾環織熟錦熟綾注絲線羅等物又以五色線織成袍名曰剋絲甚華麗又善撚金線別作一等背織花樹用粉繳經歲則不佳唯

以指換達勒辛西歲金國肆告皆許西歸多留不反今亦有目微深而髯不虬者蓋與漢兒通而生也

嗛熱者國最小不知其始所居後爲契丹徙置黃龍府南百餘里曰賓州州近混同江卽古之粟末河黑水也部落雜處以其族類之長爲千戶統之契丹女眞貴游子弟及富家兒月夕被酒則相率攜尊馳馬戲飲其地婦女聞其至多聚觀之閒令侍坐與之酒則飲亦有起舞歌謳以侑觴者邂逅相契調謔往反卽載以歸不爲所顧者至追逐馬足不遠數里其攜去者父母皆不問留數歲有子始具茶食酒數車歸寧謂之拜門因執子壻之禮其俗謂男女自媒勝於納幣而昏者飲食皆以木器好眞蠱他人欲其不驗者云三彈指於器上則其毒自解亦閒有

遇毒而斃者族多李姓予頃與其千戶李靖相知靖二子亦習進士舉其姪女嫁爲悟室子婦靖之妹曰金哥爲金主之伯固礪側室其嫡無子而金哥所生今年約二十餘頗好延接儒士亦讀儒書以光祿大夫爲吏部尙書其父死託宇文虛中高士談趙伯璘爲誌高宇以趙貧命趙爲之而二人書篆其文額所濡甚厚曾在燕識之學弈象戲點茶靖以光祿知同州冒墨有素今亾矣其論議亦可聽衣制皆如漢兒

渤海國去燕京女眞所都皆千五百里以石累城足東竝海其王舊以大爲姓右姓曰高張楊寶烏李不過數種部曲奴婢無姓者皆從其主婦人皆妬悍大氏與他姓相結爲十姊妹迭幾察其夫不容側室及他游聞則必謀寘毒死其所愛一夫有所犯而妻不之覺者九人則羣聚

而詬之爭以嫉忌相夸故契丹女眞諸國皆有女侶而其良人皆有小婦侍婢唯渤海無之男子多智謀驍勇出他國右至有三人渤海當一虎之語契丹阿保機滅其王大譴譟徙其名帳千餘戶于燕給以田疇捐其賦入往來貿易關市皆不征有戰則用爲前驅天祚之亂其聚族立姓大者於舊國爲王金人討之軍未至其貴族高氏棄家來降言其虛實城後陷契丹所遷民益蕃至五千餘戶勝兵可三萬金人慮其難制頻年轉戍山東每徙不過數百家至辛酉歲盡驅以行其人大怨富室安居踰二百年往往爲園池植牡丹多至三二百本有數十幹叢生者皆燕地所無纔以十數千或五千賤買而去其居故地者令歸契丹舊爲東京置留守有蘇扶等州蘇與中國登州青州相直每大風順隱

隱聞雞犬聲阿保機長子東丹王贊華封於此謂之人皇王不得立鞅
鞅嘗賦詩曰小山壓大山大山全無力羞見當鄉人從此投外國遂自
蘇乘筏浮海歸唐明宗善畫馬好經籍猶以筏載行其國初倣唐置官
司國少浮圖氏有趙崇德者爲燕都運未六十餘休致爲僧自爲大院
請燕竹林寺慧日師住持約供衆僧三年費竹林乃四明人趙與予相
識頗久

古肅愼城四面約五里餘遺堞尙在在渤海國都三十里亦以石累城
腳

黃頭女眞者皆山居號合蘇館女眞

合蘇館河西亦有八館在黃
河東今皆屬金人與金粟城五花

城隔河相近二城八館舊屬契丹今屬夏人金人約以兵取關中以三
城八館報之後背約再取八館而三城在河西屢爭不得其一城忘其

名其人戇朴勇鷙不能別死生金人每出戰皆被以重札令前驅謂之硬軍後役之益苛廩給既少遇鹵掠所得復奪之不勝忿天會十一年遂叛興師討之但守遏山下不敢登其巢穴經二年出鬪而敗復降疑卽黃頭室韋也金國謂之黃頭生女眞髭髮皆黃目精多綠亦黃而白多因避契丹諱遂稱黃頭女直

盲骨子契丹事迹謂之朦骨國卽唐書所謂蒙兀部

遼道宗朝有漢人講論語至北辰居所而衆星共之道宗曰吾聞北極之下爲中國此豈其地邪至夷狄之有君疾讀不敢講則又曰上世獫鬻獫狁蕩無禮法故謂之夷吾修文物彬彬不異中華何嫌之有卒令講之

道宗末年阿骨打來朝以悟室從與遼貴人雙陸貴人投瓊不勝妄行馬骨打憤甚拔小佩刀欲刺之悟室急以手握鞘骨打止得其柄找其胷不死道宗怒侍臣以其強悍咸勸誅之道宗曰吾方示信以待遠人不可殺或以王衍縱石勒張守珪赦安祿山終致後害爲言亦不聽卒歸之至叛遼用悟室爲謀主骨打且死囑其子固論善待之

遼盛時銀牌天使至女眞每夕必欲薦枕者其國舊輪中下戶作止宿處以未出適女待之後求海東靑使者絡繹恃大國使命惟擇美好婦人不問其有夫及閹閹高者女眞浸忿遂叛

初女眞有戎器而無甲遼之近親有以衆叛閒入其境上爲女眞一酋說而擒之得甲首五百女眞賞其酋爲阿盧里移賚

彼云第三酋官人亦呼爲相公

起師才有千騎用其五百甲攻破寧江州遼衆五萬禦之不勝復倍遣之亦折北遂益至二十萬女眞以衆寡不敵謀降大酋粘罕悟室婁宿等曰我殺遼人已多降必見勦不若以死拒之時勝兵至三千旣連敗遼師器甲益備與戰復克天祚乃發蕃漢五十萬親征大將余都姑謀廢之立其庶長子趙王謀泄以前軍十萬降遼軍大震天祚怒國人叛已命漢兒遇契丹則殺之初遼制契丹人殺漢兒者皆不加刑至是攄其宿憤見者必死國中駭亂皆莫爲用女眞乘勝入黃龍府五十餘州浸逼中京中京古白雷城天祚懼遣使立阿骨打爲國王骨打留之遣人邀請十事欲冊帝爲兄弟國及尙主使數往反天祚不得已欲帝之而他請益堅天祚怒曰小夷乃欲偶吾女耶囚其使不報已而中京被圍逃至

上京過燕遂投西夏夏人雖舅甥國畏女真之強不果納初大觀中本朝遣林攄使遼遼人命習儀攄惡其屑屑以蕃狗詆伴使天祚曰大宋兄弟之邦臣吾臣也今辱吾左右與辱我同欲致之死在廷恐兆釁皆泣諫止杖半百而釋之時天祚窮將來歸以是故恐不加禮迺走小勃律復不納乃夜回欲之雲中未明遇諜者言婁宿軍且至天祚大驚時從騎尙千餘有精金鑄佛長丈有六尺者他寶貨稱是皆委之而遁值天微雪車馬皆有轍跡爲敵所及先遣近貴諭降未復婁宿下馬跽于天祚前曰奴婢不佞乃以介冑犯皇帝天威死有餘罪因捧觴而進遂俘以還封海濱王處之東海上其初走河西也國人立其季父於燕俄死以其妻代後與郭藥師來降所謂蕭太后者